

四庫全書

史部

欽定四庫全書

硃批諭旨卷七十三之四

硃批王士俊奏摺

雍正八年九月初九日廣東布政使臣王士俊謹
奏為敬陳兩廣情形密請

聖裁事竊照東西兩廣雖分二省其實共為唇齒之邦
向係兩廣督臣統轄自雍正六年廣西因八達用
兵時督臣孔毓珣調遣失宜欽奉

諭旨將廣西一省割歸雲貴督臣鄂爾泰節制兩年以
來督臣措置有方調遣官兵動中機宜土司苗獠
罔不畏威懷德悅服輸誠皆我

皇上睿慮周詳知人善任之所致臣職守粵東本不敢
越分言事但就臣一得之愚竊以廣西暫歸雲貴
管轄者原為西省邊界如泗城西隆等府州與雲
南接壤雲貴督臣可以就近調遣耳若以桂平梧
柳潯南等府而論其地交錯廣東則離雲南甚遠

查桂林至百色從前本無馬遞公文皆由鋪役傳
送約二十日方到復由百色至八隘經廣南府以
達雲南陸路亦須二十三站共計四十三日往返
幾及三月今自桂林安設馬塘遇有緊急公文往
返飛遞亦兩月有餘且聞西省因設馬塘公費無
出於州縣養廉內除藩司提解外驛道又提解一
分為馬塘之用西省州縣養廉本屬不多又因公
費添解益加掣肘至武員之調考拔補者每因水

陸跋涉盤費艱難其苦更甚況查廣西鹽政皆由
官運官銷現歸廣東督臣管理而西省州縣各官
又屬雲貴督臣管轄未免呼應不靈臣思雲貴之
與廣西遼濶三倍於東省文武職員又皆遠莫能
至當此邊境救寧苗蠻向化之候似應將廣西一
省仍歸廣東督臣統轄庶西省得免公費之煩文
武均無遠涉之累非汝書生管見所能窺測朕自有因人而施因時制宜
便益孰大於此或如浙江督臣

之道

兼管蘇松下江之例將接壤雲南之泗城西隆鎮

安等各流土府州就近交與雲貴督臣兼管其桂
平梧柳潯南等府仍令廣東督臣照舊節制如有
地方要緊重務應相關會者雲貴兩廣督臣公同
廣西撫臣和衷辦理則地近而耳目易周不患鞭
長之莫及矣抑臣更有請者西省欲將肇慶府屬
之封川開建二縣改隸梧州一案其初本由雲貴
督臣因梧屬之懷集一縣四面皆鄰東省議割歸
東而西省藩司元展成時於臬司任內經管鼓鑄

見懷邑現有銅山且查開建產有金礦即與梧屬
現今開採之芋英金山近在咫尺遂有割并封川
開建歸入梧州之議但開邑逼近督臣駐劄地方
金礦封禁甚嚴故人無敢窺伺若竟歸廣西開採
東省民人見利而趨必相率爭先其為東省之患
實深叵測豈同此一縣屬之西省即無聚集為匪
之事況西省未歸廣東督臣管轄則密邇之地竟
屬鄰封彈壓無資恐易滋事是開建之不應歸入

廣西至明且切矣合併繕摺奏

聞伏乞

皇上睿鑒謹

奏

封川開建二縣改隸梧州因汝奏稱可行所以特發兩
省督臣悉心定議今乃復有此奏何前後矛盾至此朕
殊不解可明白奏覆

同日又

奏為奏明就近支領兵餉事竊臣蒙

皇上天恩畀以藩司重任諸務悉心籌畫每見兵丁赴
司領餉有跋涉之勞守候之苦州縣起解錢糧有
護送之煩水陸之費故臣於雍正七年查各協營
有離省遠與州縣鄰近者令該州縣將所徵地
丁銀兩按夏秋冬三季就近支給兵餉惟春季則
令各營赴司領餉以清長支扣缺等銀詳明督撫
批行在案兩載以來無不稱便但人心有無厭之

求而立法無屢更之理今並此一季亦欲就近撥
支現在詳請督撫批臣查議臣查各營支領兵餉
歷係預支一季如春季造過官兵領餉冊籍夏季
即照春季舊冊請領秋冬亦然及屆散餉之期兵
有逃故馬有倒斃官有叅革陞遷將所領之銀截
除名曰長支該營即以此項銀兩留之營中為公
私借用雖亦陸續造冊報司然必到年底始能核
算清楚故於冬季各營赴司領支春餉之時即以

該營長支之銀於春季餉內扣除補發庶款項得清而錢糧無侵冒之弊臣亦詳明督撫不便准行在案臣返衷自問為武員兵丁謀者至詳且悉矣且各鎮協營因公來省臣等酬酢往來如同昆弟之交人人共見共聞今伏讀

上諭聞粵東文武不和上厪

聖懷臣不勝惶悚戰慄竊思文員武員同為

皇上臣子若不和衷共濟必致下則貽誤地方公事上

則辜負

聖明簡用雖至愚頑何忍出此臣見粵東文武意見稍異之處不能必其盡無而顯然露之形迹彼此爭執實未見其有此也謹將臣支放兵餉及近日文武情形據實奏

聞謹

奏

不論實行若何但於辭說是務則非矣文武之間和之

與乖返躬內省自應不昧必待露諸形跡而後始謂為
不和耶

雍正八年十月十一日廣東布政使臣王士俊謹
奏為恭報晚稻豐收米價平減事竊照粵東今歲雨
暘時若田禾茂盛茲晚稻業經刈獲據各府州申
報前來查廣州府屬收成九分十分米價每石五
錢八九分至六錢一二分南雄府屬收成十分米
價每石六錢一二分至六錢三四分韶州府屬收

成八分九分米價每石五錢至五錢三四分惠州
府屬收成九分十分米價每石四錢五六分至四
錢八九分潮州府屬收成九分十分米價每石四
錢五六分至四錢八九分肇慶府屬收成八分九
分十分米價每石六錢四五分至六錢六七分高
州府屬收成八分九分十分米價每石四錢五六
分至四錢七八分雷州府屬收成九分米價每石
五錢至五錢三四分廉州府屬收成九分米價每

石五錢八九分至六錢一二分瓊州府屬收成八
分九分米價每石六錢一二分至六錢四五分羅
定州屬收成十分米價每石四錢八九分至五錢
連州屬收成十分米價每石五錢至五錢二三分
年豐米賤士民安業理合據實奏

聞謹

奏

覽收成分數深慰朕懷但一秉公忠黽勉吏治以公心

處事以和氣待人何慮

上天不有嘉徵下應也勉之

同日又

奏為據實陳明事竊照叅革原任連州知州朱振基
私設逆賊呂留良牌位一案奉

旨將朱振基拏問交督臣郝玉麟嚴審究擬嗣據該府
縣審供定以斬決招解經署按察使臣黃文煒會
同臣訊將朱振基照大逆不首律擬斬立決招解

督臣郝玉麟親審具

題在案臣以刑名案件非屬藩司職掌亦非臣主稿
諒督臣必照司審供擬具

題茲忽接署按察使臣黃文煒轉抄督臣郝玉麟諭
單一紙移臣備案內將朱振基謂其情有可原令
臬司改擬杖罪

題結臣不勝駭異查朱振基與逆賊呂留良鄰鄉接
壤平日自必習知悖亂惡逆之情形傾心附和故

敢於任所設位奉祀非若禽獸不如之曾靜山僻
無聞者可比似此黨惡姦邪

國法人心無不以亟請誅戮為快今督臣曲法市恩
在署按察使臣黃文煒實切悚惶不能專主而督
臣又久經

題達臣事後方知無從力爭改正雖朱振基已伏冥
誅臣再四思維何敢仰欺

皇上自干罪譴不得不據實陳明并將署臬司移送督

臣改詳諭單抄錄呈

奏伏乞

睿鑒謹

奏

有此一奏乃汝之幸也此等事何能逃朕鑒察汝奏未到之先已於題本內嚴旨批駁矣所奏知道了

雍正八年十一月十五日廣東布政使臣王士俊

謹

奏為密請

聖裁事竊照南澳一鎮統轄左右二營地分隆深雲青
四澳右營隆深二澳屬廣東饒平縣管轄左營雲
青二澳屬福建詔安縣管轄該處並無文員駐劄
所有戶口生童以及徵租散餉等項俱惟營員造
冊移送為憑其間有無虛冒文員遠隔海面相距
縣城二百餘里勢不能親至稽查恒有鞭長莫及
之虞臣思南澳為兩省要區孤懸海中雖去內地

不遠鎮營統轄兵弁而民戶仍為縣屬一切編查保甲送考生童散餉監放在在俱應文員經理

請於該處添設閩粵海防軍民同知一員與鎮臣一同駐劄彈壓嚴查保甲編烙漁船監放兵餉并將潮州府經徵項下每年澳租銀三百餘兩及閩省應徵澳租銀數俱歸同知徵收兌支左右二營兵食仍於鎮營統巡會哨之時凡配撥兵船出洋月日飭令該同知一體查報朔望恭行宣講

上諭化導兵民共遵法紀如有爭訟命盜等案許令就近勘審各照閩粵定界由漳潮兩府詳報以專責成庶文武互相察核耳目易周力可兼顧其於海疆似有裨益但事關兩省交會理合密摺呈

奏伏乞

皇上睿裁謹

奏

應告之該督撫酌定可否

同日又

奏為奏明事竊照廣東省新舊二城地方廣濶凡院
司道府以下文職衙門及將軍都統旗員兵弁俱
駐劄舊城之內其外則有新城惟海關監督衙署
及廣州協武營防守而司府兩監重犯俱在新城
文職僅有司獄二員督同禁卒看守而已其新城
之外商賈輻輳尤為人煙稠密之所日間文武員
弁兵役人等內外巡查呼吸可通固為嚴密惟定

更後舊城關閉鎖鑰係交將軍專管新城內外一切巡夜查姦並民間偶有火災等事雖經遵奉

諭旨製備救火器具撥定人役預為防範然無文員督率地保甲長武員呼應不靈舊城文員聞報馳救請鑰開城業已遲悞臣為地方起見隨經會同臬司查廣州府督糧通判並無經管倉庫錢糧議令移駐新城之內再將南海縣縣丞移駐新城之外專司巡夜防火之事一有不虞立即會同協營親

帶兵役分頭馳救一面飛報內城以便隨後策應
庶內外皆有文武會同查察則巡防益密而控制
得宜矣除已詳明督撫二臣酌議咨部外理合據
實陳明伏乞

皇上睿鑒謹

奏

既經詳明該督撫聽候督撫裁奪

同日又

奏為遵

旨敬刊

上諭恭謝

聖訓事雍正八年十月十二日奉部文行抄發

上諭一道以粵東文武不和特頒

諭旨煌煌訓誡復

命督撫等遵照刊刻凡通省文武大小員弁各給一道

朝夕觀覽臣跪誦心維戰兢悚惕仰見我

皇上至聖至明於粵東文武不和之惡習已蒙

睿照無遺臣謹遵

諭旨將奉到

上諭敬謹刊刻四千道通行分散文武大小各官務期
實心仰體不敢再蹈故轍自干罪譴外理合恭謝

天恩至現今新任提臣張溥尚未到任提督印務仍係

調任提臣王紹緒管理撫臣鄂彌達已於十一月

十一日到任視事臣惟殫竭愚誠盡心協助以求

夙夜無忝仰報

聖恩於萬一耳至按察使臣黃文煒與臣為兒女姻親
前因署事未敢具

奏近蒙

恩旨准其實授緣藩臬為通省刑名錢穀之總滙職任
累共矢公慎則同舟之雅益彰若黨比親情則偏私之
所關匪細臣與黃文煒共矢公慎力圖報效斷不
嫌不免返已無慚寧有浮議耶
敢稍徇私情上欺

君父理合一併奏

聞謹

奏

覽

同日又

奏為立法清查稅畝仰祈

睿鑒事竊照廣東通省民屯稅畝歷來並無魚鱗冊籍
填註坵段弓口田形四至科則數目止憑黃冊籠
統載入土名老名字樣其間詭冒欺隱爭占搆訟

弊端百出不可勝窮前經奉

旨欺隱地畝准其首報雖民間自首者已據各屬陸續具報然不立法清查勢必觀望遷延臣輾轉思維若欲丈量實恐滋擾莫如落甲清查之一法最為簡便易行蓋在官清查則地方遼濶里戶之孰虛孰溢難以周知在本圖本甲之人田畝有無虛溢知之最悉自行清查甚易如縣屬東南西北共有幾圖每圖立圖總一人分作十甲每甲分十餘戶

不等再立甲總一人即著落該圖甲里戶公舉身
家殷實素相推重者報名充當責成秉公丈量查
算再刊刻戶單一紙其式前列某圖某甲某戶務
開的名不許混開老名次列該戶額稅若干再次
列該戶現管田地山塘上中下則稅畝若干註明
的實土名及坵段四至弓口尾結一總合之原額
有無溢稅註明結總之下此單蓋以縣印每戶給
以三張俱令業戶自向圖甲總處領單公同清丈

逐一填註其田在本圖本甲者即本圖甲總據業
戶填單細加清查其田在別圖別甲者別圖甲總
據業戶填單查明完糧稅額是否相符以定有無
溢稅其戶單業戶圖甲總各存一紙圖甲總細查
業戶田畝果無欺隱然後造冊出具甘結繳縣核
對現徵糧冊如該戶田稅已足即歸入全書額內
如不足數扣出此戶再查如有溢數即令報陞免
究從前欺隱之罪每圖限以四月造冊呈縣如該

圖戶單未經繳齊圖冊未經造就之時業戶或將田畝漏造自行出首者仍許圖甲總查明歸入本戶陞輸若圖冊已經造繳到官被旁人出首者是該戶安心欺隱或現在告爭田畝不肯填入戶單者圖甲總查實稟明該州縣即行按冊查丈將首出田地分別賞給首人仍治本人欺隱之罪田鄰一併究處如此則造冊之先有自為清查之法欺隱者自必踴躍填單造冊之後又有被首給賞治

罪之條欺隱者自必交相警惕矣臣現將此法飭行南海縣詳明督撫實力奉行臣復同南海縣共捐銀三百兩為戶單冊籍紙張之費士民歡欣樂從已據自行首報者不一而足頗有成效將來推廣行之通省州縣俱可照此清查惟有所需冊籍紙張之費大縣約須三百兩中縣二百兩小縣百餘兩州縣之養廉為充州縣之用勢難責令捐辦可否仰懇

天恩凡有清查之州縣所需冊費准於司庫所存落地
稅羨餘銀內動支給發則通省稅畝俱有冊籍可
稽而在官在民不致仍前滋弊矣理合繕摺奏

聞伏乞

皇上睿鑒謹

奏

一二州縣牧令得人尚可試行非通省可行之事也若
令通省照行恐更紛擾無益

雍正九年正月十二日廣東布政使臣王士俊謹
奏為恭謝

聖訓敬繳

御批事雍正八年十二月初六日及二十九日臣齋摺
家人先後回粵奉到

硃批隨即恭設香案望

闕叩頭訖臣啟匍跪讀口誦心維

聖訓諄切不啻耳提面命臣心凜肅倍切矢慎矢公臣

有一得之愚

聖明悉加採擇臣有愚昧之處

聖恩必加提擢臣雖至愚極陋敢不殫竭駑駘以仰報
皇上洪恩於萬一理合繕摺恭

謝並將兩次奉列

硃批奏摺一同呈繳謹

奏

實心承領遵奉方能獲益也

同日又

奏為敬陳要地之宜經畫以圖久遠治安事竊查粵東廣肇韶三府地居全省上游所屬州縣非濱臨大海即枕藉崇山其間設縣分防文武控制臂指各得其宜惟廣肇二屬之新會開平二縣界內有名大官田者其地東距新會縣城六十餘里西距開平縣城八十餘里逼連阜幕崑崙等處大山前因宵小出沒不常縣營遠莫能及以致大官田禾

谷坪等處原有可耕地畝約計八百餘頃人無所恃概置荒蕪自康熙五十年以後惠潮貧民漸有來此樹藝者并有力之家結伴耦耕開荒成熟者現在墾荒無主之地十有六七漸成村落究無城郭可恃未免徘徊觀望地利不能盡舉先據民人伍德彛等情願捐銀六千兩請作建縣墾田工本隨據如數繳貯廣州府庫臣為地方起見業經詳請督撫二臣飭委糧驛道陶正中率員前往大官

田查勘田畝村落及可否建縣一切情形俟覆到
另行妥議請

旨外再查廣韶交界之清遠英德二縣地處衝途萬山
環疊深林密箐最易藏姦且內連搖崗更稱難治
先經前任撫臣楊文乾議於英清交界適中之大
埔坪分立縣治以資彈壓嗣因經費無出臣於雍
正七年十一月內擬將韶州府通判移駐其地并
於府屬營汛抽撥千總一員兵丁八十名與通判

駐劄一處協力巡防庶幾文武交資稽查嚴密詳覆在案尚未

題請茲撫臣鄂彌達到任伊始臣將一切經理地方要務向撫臣悉心商酌聽撫臣次第舉行以圖久遠治安仰副

皇上宵旰勤求之至意合先繕摺奏

聞伏乞

睿鑒謹

奏

所奏建縣各事宜均當詳明督撫聽候酌定

同日又

奏為酌開電白河渠利賴永垂萬世事竊照高州一府接壤雷廉二郡土曠人稀地勢平行素稱產穀之區米價甚賤且南海等處百貨駢集惟因中隔陽江縣之直隴及恩平縣一路舟楫不通米穀無由直達省城貨物艱於陸運究之直隴等處原有

古河可以疏濬相通者備查高州府志內載前明
成化五年分巡僉事道陶魯曾經商之父老相度
情形由茂名縣之梅菪至電白城西開通南港以
達陽江縣之直隴通恩平縣之河道即可徑抵省
城計期五晝夜可到米穀貨物無不流通商民利
益甚大惜其疏濬已至直隴惑議中止數百年來
無有再為議及者臣屢囑高州府知府張兆鳳親
身踏勘嗣據稟稱查電白縣沙塍歷茂名縣梅菪

以達化州吳川現通舟楫無庸開濬外惟電白城
西舊河以至直隴約二百餘里有原日河身大
半壅塞中多熟田等語臣以事關重大未敢率為
詳請但思直隴地方既有舊河形跡思平現有河
道可達省城不難設法疏通今若於電白河渠因
其舊跡遴委幹員悉心相度於壅塞處所逐段丈
估悉照河工土方之例核明定價發帑興工并將
開挖河身之成熟田畝豁其稅額另行報墾抵補

如此河渠一開直通省會不特百貨流通商民便利且高州米穀源源輸運不致陳陳相因將見廣肇惠韶各府居民向之仰給於西省米糧者今更取資於本省而利賴永垂萬世矣臣現在據詳委員勘估繪圖另行詳請督撫二臣酌量核

題請

旨外謹先繕摺奏

聞謹

奏

該督撫具題到日有旨

同日又

奏為遵

旨議覆事竊照兵部議覆原署廣東撫臣傅泰

奏請民間所用刀鎗馬義概令報官刊刻姓名一案

奉

旨此本內所議刀鎗馬義俱令刊刻姓名及取具兩鄰

保甲互結存案之處似屬紛更民間未免擾累且恐
姦猾之徒私藏器械而良善之民畏懼盤查不敢存
留轉無禦盜之具著郝玉麟鄂彌達王士俊各抒己
見悉心酌議具奏欽此欽遵轉行到臣仰見我

皇上保護安全立法務期詳慎之至意臣伏查粵東地
方依山濱海民間禦盜防家必資器械除律載應
禁軍器不許存留私用外其餘刀鎗馬叉為類不
一俱不在禁限之內比戶皆有非如鳥鎗本係應

禁民間可以不用責令其按照尺寸報官鑿字者
比是以刀鎗馬义良善之民有之猶可共相抵禦
姦惡之徒舍之即不克以逞兇原不在於有無刊
鑿名姓也

皇上睿鑒至明其刀鎗馬义等械刊鑿姓名之處似應
停止惟令各該地方按照甲冊將某某戶內實有
刀鎗馬义及合式刊字鳥鎗等械不拘何項悉令
自行開註門牌甲冊之內練保查明彙冊報官存

案如有遺失亦即據實呈明於門牌甲冊之下分
析開除以憑察核如此則民間捍禦有資有司稽
查有據而無所紛更擾累矣抑臣更有請者烏鎗
火藥定例綦嚴自應立限查繳但粵省地方如猺
排黎崗等處有難槩論者從前失察烏鎗之例止
於罰俸一年地方官尚畏避處分即有鎗礮犯案
皆不敘入以求免罪今降調處分更重其為規避
之計更當益甚立法猶未盡善應否再為分別如

命盜案內有擅用烏鎗人犯州縣官即據實敘招
開報並無隱諱或經別縣審明追繳者將失察之
地方官仍照從前定例予以罰俸處分倘有明知
案內私用烏鎗人犯不行敘入追繳希圖隱諱經
上司察出開報職名者亦照諱盜之例降二級調
用如此則失察之咎平日既無可寬諱報之條事
後處分嚴切各官自必實力查追不敢姑容徇縱
矣除詳督撫二臣轉請代

奏外理合繕摺奏

聞謹

奏

題到之日有旨

雍正九年四月十一日廣東布政使臣王士俊謹
奏為奏明事竊潮州鎮臣馬紀勲於本年二月欽奉
諭旨命往肅州軍前辦理軍務奉文到日潮州隔越省
城千有餘里臣素知馬紀勲清苦一應軍裝盤費

或恐不能措置以致有誤行期臣隨經飛飭潮州府知府即速資助離潮赴省時遇督臣在省臣即先為面稟督撫二臣籌畫伏查西北等省凡有奉差辦理軍務之員皆沐

皇上天恩賞借本任俸薪與隨丁糧餉今馬紀勲奉

命前往其家口仍留在潮亦賴俸薪以資養贍適馬紀

勲差役到省借司庫銀二千五百兩以辦軍裝督

撫飭議臣議於司庫公用銀內暫支銀二千五百

兩俟其到省即可製備起程復慮長途用度不足
臣又另與督撫二臣各幫盤費銀五百兩當經督
撫允議借支迨馬紀勲於二月二十五日抵省臣
即如數兌交二十七日隨即馳赴軍前矣至暫支
公用銀二千五百兩馬紀勲願於應得俸餉內分
限四年扣還呈請督臣檄行查議詳明浴部在案
應否

賞給出自

天恩理合恭摺

奏明伏乞

皇上睿鑒謹

奏

馬紀勲所借銀兩不必仍令扣還即將此旨傳諭督撫
可也

同日又

奏為密請

聖裁事竊照直省將軍督撫提鎮標兵特荷

皇上天恩次第賞給銀兩營運生息為伊等吉凶用度之費務使公平辦理均沾實惠此誠曠古未有之殊恩臣前後接奉督撫二臣檄行欽遵

諭旨陸續動支司庫銀共一十二萬兩為將軍督撫提鎮標兵生息之用伏查廣東一省通計駐防額設并新添水陸兵丁共七萬五千八百七十一名內將軍標駐防旗兵共六千五百零七名并照部丈

開列督撫提鎮標兵共二萬五千七百五十一名
已領帑銀生息賞給外尚有水陸協標營塞兵丁
四萬三千六百一十三名未蒙

賞給臣查伊等分防設汛有戍守之勞窘迫尤堪憫恤
似應恭請

敕下督撫提鎮諸臣將現賞帑銀之內一體通融勻給
務俾合省兵丁均沾雨露則至公至平直與

此議候朕思之
覆載同其高厚矣至於營運之處粵省督撫提各標帑

項俱經商人借領行鹽按月二分行息彙交鹽道轉繳其各鎮有議開典當者有議置買田園者有議借給鹽商者有議屯積貨物者迄今商議未定臣思兵丁平時糧餉之外或有吉凶需用無所取辦每至加五六七八負債填償計及有借當還必力加撙節不敢妄費今以生息為其分內所應得一遇吉凶事務必有不當用而用者并有可以不領而領者甚至希圖多領不遂而反生怨望或營

運偶缺不足支應而歸咎於人者皆事所恒有臣
不揣愚昧熟思審處與其營運以待將來之賞給
莫若將前項帑銀分貯各標營公所凡有兵丁吉
凶要務許令五人互結出具保領以四兩五兩為
率准其借用毫不取利仍於月餉內按季分扣歸
還借項如此則各標兵丁得借無利之銀業已沾
恩無極且有借有還必不敢希冀求多致滋花費在官
既免營運而多籌畫之煩在兵得沾餘潤而無轉

爾全未達賞銀本旨冒發妄論殊屬不通亂道之至

貸之普惠均利溥帑項自可常存無缺矣微臣就
粵言粵是否有當伏乞

皇上睿鑒謹

奏

覽

雍正九年五月初六日廣東布政使今陞湖北巡

撫臣王士俊謹

奏為

聖恩委任愈隆臣心戀

主愈切恭懇

陞見敬抒誠悃事竊臣一介庸材九年外吏受

恩日深思慕日甚於上年恭請

陞見未蒙

俞允中懷迫切感戀難名茲復叨蒙

聖恩用臣為湖北巡撫聞

命戰慄感激涕零不知所措伏思楚風勁悍素稱難治

諸凡整理措置臣才識短淺何以設施允當雖力圖犬馬之報不敢絲毫少有怠安第未親奉

聖明訓誨示臣規則知所法守深恐有負我

皇上委任盛心臣現在欽遵

諭旨俟新任藩司臣楊永斌抵粵將一應經手正雜錢糧并地方公務交代明白隨即起程外仰懇

天恩准臣赴京

陛見俾得仰覲

天顏跪奏一切稍遂數年戀

主之心且獲祇聆

聖訓更知楚境吏治民風之要矣為此恭摺陳

奏臣無任瞻戀依馳激切待

命之至謹

奏

有旨命爾來京陛見矣

同日又

奏為恭報早禾秀茂米價平減事竊照本年粵省三
春足雨早禾栽插以時立夏之後更復雨暘時若
高下田禾現在吐秀成實暢茂倍於往年米穀時
價較春間更為平減查各府州屬每米一石自三
錢八九分起以至五錢五六分不等轉瞬早稻登
場米價更當平減閭閻足食共慶豐亨是皆我
皇上德洋恩溥澤徧寰區之所致臣覩此大有景象惟
倍切冰兢敬迓

天庥永永無極謹

奏

覽奏粵省雨澤霑足米價平減朕懷深慰

雍正九年十月十二日湖北巡撫臣王士俊謹

奏為密請

聖裁事竊查直省奉行秋審定例每年五月內將各州縣

題准部覆在監人犯提解到省經督撫司道等官公

同察審具

題是皆欽恤深恩務求平允之至意臣自初任祥符
以及在粵六年每當秋審屆期一切人犯府縣並
未覆加察核無論路途遠近俱將監犯預為僉解
臬司衙門在途往返則有脫逃疎縱之虞到省寄
監復有擁擠薰蒸之患炎暑易生疾病瘕斃恒至
多人迨秋審之日總以各案原招為主未嘗逐名
將原犯情節再行翻駁臣思

題達重案當州縣承審之初一有未協府司院再三
駁審及成招之後解府解司解院業已幾經審勘
然後詳請具

題列入秋審者蓋欲察其情罪之輕重分別情實緩
決可矜三項候

旨遵行也是則秋審之案惟察原招之有無遺漏以定
爰書非謂其情罪尚有可疑必須調犯親審者可
比可否仰請

聖恩嗣後每逢秋審責令州縣將各犯原招細加覆勘
分別輕重詳府覆核由府彙冊詳報司院聽候屆
期在省公同察勘原招詳加區別或有縣府所定
不符者院司改正具

題不必盡將監犯解省以致有脫逃病故諸弊庶幾
仰副我

皇上如天好生之德於無極矣是否允當伏乞

睿鑒施行謹

奏

覽所論奏殊失輕重之宜秋審係國家大典循行已久何必復議更張

雍正九年十二月初六日湖北巡撫臣王士俊謹
奏為恭報湖北現今米價事竊查楚省本年時值豐
收仰賴

皇上福庇人民安業三冬天氣晴暖麥苗早已吐青省
城漢口米價亦無增減詢據布政使徐本開報各

府州屬米價每石自七錢五六分起至八九錢一兩以及一兩五六分不等俱係市斗之價比倉斗較大民間俱云豐收之後米價亦平臣惟詳加勸諭務令加意節儉愛惜米穀豐年愈謹蓋藏以期克副我

皇上子惠元元之至意耳為此具

奏伏乞

睿鑒謹

奏

覽奏湖北米價情形朕曷勝額慶

同日又

奏為仰體

皇上敬陳

睿鑒事竊查山東被水之民蒙我

皇上特頒諭旨令於所致之處查明留養動用存公銀

兩給以口糧資其路費毋使一夫失所

皇恩浩蕩實為從來所未有東民聞風感泣頂戴無已
臣由河南一路經過於信陽州以南見有大小男
婦陸續來楚者詢係山東鄆城沂州等處人民居
多據伊等稱被水之後即覓食外方原不知本省
有遣官賑濟之

皇恩及到江南廬州等處俱有地方官日給口糧因彼
處柴草騰貴聞得湖廣豐收所以來此就食明春
仍要回去耕種營生等語臣隨飭令所過州縣凡

遇東民到境務必仰遵

諭旨加意撫恤給以口糧路費安頓得所茲臣抵任半月有餘據江夏縣陸續報到東民共五百六十餘名口漢陽縣報到東民三百六十餘名口黃陂黃岡應山監利等縣共報到東民一百一十餘名口俱各隨到隨即安頓寺院庵堂分散居住各給口糧鹽菜不致缺少臣又捐發銀兩製備棉衣按名給領目下尚有續到者雖未有定數自當料理妥

協令伊等不致失所待至新年資給回鄉不誤耕作所有楚省安置東民情節理合具摺陳明伏乞
睿鑒謹

奏

能仰體朕心將隣省災黎如是撫恤周到甚好

同日又

奏為據實陳奏事竊查湖北八府一州民風剽悍而
武漢黃安荊襄等府又素稱多盜臣到任伊始見

楚省一切情形有不得不急為整理者如弭盜莫
先保甲乃臣自入楚境所過鄉村市鎮問以保甲
而門牌甲冊多未舉行即州縣民壯止供差遣之
役操練竟為虛設甚而汛防疎懈千把竟不帶刀
兵丁亦無整束是以緝捕不力竊刦頻聞此保甲
民壯廢弛之咎所急當整理者一也至如府州各
縣承辦案件向皆疲玩相仍命盜不加確審實情
未得朦混招詳以致徒事駁查二叅限滿猶未審

結臣檢查舊卷不下百餘件甚至互相標榜苟且偷安大闕政體此吏治因循之咎所急當整理者二也再如楚省士風向多澆薄漢口一鎮驟行客店半皆無賴青衿局騙吞商盡屬著名劣監教官不為約束有司不為嚴究貓鼠同眠優劣不分此士習頹靡之咎所極當整理者三也又如臣經過道路若黃梅縣之白湖鎮三省通衢堤廢不修應山孝感黃陂漢陽等縣之楊店溝口漢鎮等處俱

係官商大道而路徑低窪缺陷難以馳驅正道兩
傍均未開溝種樹行旅商賈苦於跋涉此道路不
修之咎所急當整理者四也其他水利堤工是否
完固社倉積穀是否無虧臣俱現在逐一清查通
盤辦理而督臣邁柱適於臣到任之日即往襄陽
料理涼州軍務未及面商一切俟其回署即當和
衷斟酌實心整飭總期有益地方不敢少存意見
之私亦不敢稍有扶同之弊上欺

君父自干重譴也理合一併

奏明伏乞

睿鑒謹

奏

百凡詳審徐徐次第為之不可急驟毋涉孟浪欲速則恐不達魯論所以垂戒也

同日又

奏為據實奏

聞事竊查養廉一案雍正六年七月內欽奉

諭旨各省內或有尚未分給養廉之員著各督撫悉心
商酌一面辦理一面奏聞寧可以州縣應出之項解
至藩庫從公發給而不可使其自相授受廢公義而
徇私交留禮儀交際之名而長貪婪賄賂之弊也倘
再有私受規禮者將該員置之重典其該管之督撫
亦從重治罪欽此煌煌

聖諭至明且悉各省無不欽遵奉行在案詎湖北迄今

三載尚未定議各州縣錢糧名為加一火耗俱有坐平等項名色核算實有加一四五不等所有司道府廳州縣養廉止照前任督臣楊宗仁定議於加一耗羨之內以三分二釐扣為州縣養廉以三分解布政司為通省公用以一分五釐為布政司養廉

奏銷之用如臬司六釐各道一分五釐知府一分同知四釐令各州縣自行分送為各衙門之養廉至

管稅管糧之同知通判謂伊自有羨餘亦未定有若干數目此蓋一時權宜之計其實大州縣按額收耗即扣留三分二釐積算有多至二千兩以外者小州縣即以加一之數全給亦有不足百金之數者不均實甚臣查司道府廳州縣除火耗養廉之外尚有鹽規糧規當商雜稅等項歷來各自收受添補養廉有數千金數百金之不等均未據實報出解至藩庫從公發給偏枯更甚夫司道府廳

養廉私相授受不免開餽送需索之端鹽規各項
自行收用不無額外勒取之弊再如府州縣之經
歷縣丞雜職等官均未議及養廉伊等餬口無資
勢必寡廉鮮恥剝削小民尤為深害廉隅不飭吏
治何以澄清臣受

恩深重何敢瞻徇扶同不亟為整理現在恪遵

諭旨檄行布政司詳查各項實在數目總歸藩庫分給
酌地方之繁簡定養廉之多寡大小均沾章程永

定仍一面會同督臣邁柱悉心斟酌妥協另行具奏外所有辦理通省養廉情節合先奏

聞伏乞

皇上睿鑒謹

奏

養廉一節務令大小均平毋致稍有偏枯確商妥議奏聞

同日又

奏為據實密奏事竊查湖北通省照糧均丁一案於
雍正六年十二月內經督臣邁柱會同原任撫臣
馬會伯據原任布政使徐鼎詳報具

題部覆奉

旨准行在案內將武昌等四十二州縣減丁銀一萬八
千九百二十八兩八錢零攤入江夏等一十九州
縣之內照糧加增各州縣有額丁本多加增者止
有數十兩并數百兩及千兩二千兩以上者民間

已多賠累至鍾祥一縣向額丁少糧重今照通省
勻攤於原額丁銀二千四百三十兩有零之外又
加增丁銀三千五百八十六兩零以致上年九月
通縣民人羣至縣堂公繳農具求請詳豁今年三
月內縣差下鄉催徵加丁銀兩而通縣一十三鄉
百姓復於城東武當宮地方聚衆呼籲知縣王世
經並不委曲勸諭為民請命竟知會城守率領兵
役出城捕捉衆皆驚惶奔走彼處橋窄人衆墮水

死者一百餘人該縣隨以聚衆抗糧通詳

題究至今尚未審結臣訪聞確實寢食不寧伏思丁
隨糧轉原屬便民實政但各省各有情形貴於因
地制宜方無此增彼減偏重偏輕之弊故各省攤
丁皆以本縣之丁仍隨本縣田糧原額勻攤者赤
丁枯丁得免賠累事出至公間有通省勻攤者必
其科則人丁不相上下方見均平從未有加派均
丁之數反多於該縣額丁之數者欲強其以此縣

之田糧代賠別縣之丁賦無怪鍾民抵死不完以致激成民變總由從前經理錯誤以至於此臣何敢扶同隱諱貽無窮之累究於

國課無補而且民命攸關以臣愚見楚省均丁應照河南廣東等省以各州縣之丁銀歸各州縣隨田完納無增無減乃為至當不易至現今聚衆一案為首者固當執法自不可以姑容然民負切膚之痛縣官身在地方不能撫馭以致斃命多人亦不

能稍為寬假也臣為地方民生起見不得不據實

瀝陳密

秦伏乞

皇上睿鑒施行謹

奏

與督臣邁柱會商妥確具題請旨可也

硃批諭旨卷七十三之四

欽定四庫全書

史部

硃批謝旨卷七十三之五

臣永瑤恭校

編修臣裴謙覆勘

總校官中書臣朱鈐

校對官中書臣高中

膳錄監生臣王鍾岱

欽定四庫全書

硃批諭旨卷七十三之五

硃批王士俊奏摺

雍正十年正月十八日湖北巡撫臣王士俊謹

奏為恭報冬雪春晴米價平減事竊照湖北上年豐
收麥苗遍野於十二月十五六七等日冬雪滿郊
正月元旦晴明初二初三等日又得大雪盈尺有
餘麥田霑足農民無不欣悅現今武漢兩府近省

米價較前平減即黃州安陸荊襄等處亦皆冬雪
春晴與省城無異米價亦平東作漸興春耕有賴
為此繕摺奏

聞伏乞

皇上睿鑒謹

奏

據奏楚省晴雪應候米價平減朕以手加額覽之

同日又

奏為敬陳一得仰懇

睿鑒事竊照鹽勛為民食所必需亦為課餉所關繫故
引有定額價有定數源源運售則市價常平商本
不虧民無淡食斯為兩便查湖北一省每年約銷
淮鹽三十五六萬引又帶銷引鹽四萬道合計不
下四十萬引由兩淮完餉掣鹽候發梘封始得開
行至楚俱在漢口鹽店分發行銷但查向來額引
雖有定數商人辦課不無遲速掣放梘封又有守

候緩急之不一是以鹽船到楚多則商有虧本之慮少則民有淡食之苦且鹽臣並無數目知會鄰省無可稽察商人每於年底需鹽之時捏稱鹽缺暗短觔頭重價累民臣思鹽價之所以長落不常者皆由額引未經按月撥定之故如湖北額引四十萬以一年計算每季應銷十萬引每月應銷三萬三千三百有零鹽臣於每年批定額引之中立定期務令商人將一季應運之鹽於季前完足

課餉場鹽一到立行盤掣改網上船即發桅封開
運不令守候一面將所運鹽觔數目并開行日期
咨明銷鹽省分之督撫按期查察不許中途故意
逗遛即或風信不常遲亦不過半月如過半月不
到督撫立即咨催鹽臣嚴行查究如船到漢口商
人即將所到數目報明該縣轉報并令選擇正商
經理如此運鹽有定數商人得以分季完餉力自
有餘開行有定期鹽船不致任由停泊事有專責

按季分運既免壅滯不銷有虧商本隨時充足亦無陡長價值致累貧民至鹽規一項查據商人開報現奉鹽臣核定湖北各衙門共九千兩緣從前未定養廉各官相沿收受今通省養廉不足現於自首羨餘銀內仰懇

天恩賞給則此項鹽規自應永行革除以紓商力且免藉口長價是否有當理合恭請

聖裁敕示遵行謹

奏

楚省鹽務情節詳悉致札於尹繼善汝二人商酌妥協
會同奏聞候朕裁定將此奏并朕批諭俱令伊明白知
之

同日又

奏為據實奏

聞事竊知府有表率屬員之責必須精明強幹方能察
吏安民事無叢脞今有安陸府知府談九敘年已

望七精神懈怠政事因循不能振作臣面加策勵
據伊自稱年力就衰雖欲勉盡職守而精神照管
不到諸事不覺漸至懈怠等語臣查安陸一府民
頑多盜最為緊要似此年老委靡實不克勝重任
必致有誤地方但無甚劣蹟理合據實

奏明仰懇

皇上天恩另揀記名能員補授安陸府要缺其談九敘
給咨赴部引

見伏候

聖裁庶要地得人吏治整飭矣謹

奏

候朕另有諭旨

同日又

奏為恭請

聖裁事竊查湖北巡撫衙門向設筆帖式三員以備翻
譯清書之用今現在二員一係鑲藍旗人伊爾根

於雍正元年來楚一係正藍旗人瓜爾察於雍正
二年來楚俱經准到吏部咨行在案迄今七八年
翻譯清書之外別無所事額俸有限養贍不敷若
因目前無事咨送回京則伊等在外年久亦能熟
悉風土人情未便置之閒散臣伏查在京各旗筆
帖式內如有才具可觀年力富強者原有保舉挑
選補放同知通判等缺之例今伊爾根瓜爾察二
員臣見其年力甚壯人亦明白可否仰請

天恩准照在京之例遇有楚省同知通判缺出許令酌量委署若能勝任具

題補授既免伊等坐糜廩祿而隨材器使益當乘時

奮勵報效

皇恩矣是否有當伏乞

皇上睿鑒施行謹

奏

送部引見候旨遵行

同日又

奏為請

旨揀發人員以資實用事竊湖北一省地居衝要所屬
州縣佐貳等官於本任職守之內尚須黽勉策勵
各勤所事方免誤公至於員缺委署以及公務差
遣在在需人伏查雍正八年以前奉發楚省以知
縣試用并知縣以下酌量

題補人員內除事故等項外餘俱陸續

題請實授及現在委署試看者止有數人臣與督臣
邁柱公同商酌仰懇

皇上天恩准將在部候補候選之知州知縣內揀選十
員知縣以下試用并雜職等官揀選一十五員令
赴楚省遇有員缺以憑酌量委署試用如能勝任
按照例限具

題實授庶委署得人公事克辦實於吏治有益理合
繕摺恭

奏伏乞

睿鑒施行謹

奏

照該撫所請行吏部知道

雍正十年二月十三日湖北巡撫臣王士俊謹

奏為恭報麥苗得雨米價平減事竊湖北入春以來

天氣晴暖風日融和二月初三初四等日連朝得

雨麥苗早者長有六七寸遲者亦有四五寸青蔥

滿目

恩膏普被共樂恬熙省城漢鎮米價較前平減其餘
各府米價俱平理合繕摺恭

奏伏祈

睿鑒謹

奏

覽奏湖北麥苗得雨米價平減不勝欣慰

同日又

奏為請

旨通行事竊惟

社稷山川載在祀典每年春秋二祭俱動支正項錢糧
依期致祭凡以昭事明禋春祈秋報實關

國家鉅典是享祀之誠壇壝之制毋容缺畧不修褻
越從事也臣在廣東布政使任內每祭務必躬親
行禮修築壇位繚以周垣前設壇門後植松柏以
全規制通省舉行在案今查湖北武昌為省會首

郡

社稷山川並未設立致祭壇位每屆祭期布政使僅委員行禮荒郊草具褻玩不恭而通省竟有不知舉行者臣隨嚴行查勘刻日建立通飭去後伏思

社稷山川之神本與

先農並重均載祀典守土者各盡敬誠以祀之則陰陽和而風雨時利益民生實非淺鮮今府州各縣止知按額支銷祭品銀兩並未將牆垣壇址擇地營

建隨時修整以致日就缺畧各省恐亦未盡舉行
似應仰請

聖恩敕諭直省督撫將所屬州縣應設

社稷山川兩壇坐落基址丈尺并築圍牆前門後樹務
合體制該地方州縣原有者敬謹奉祀未建者擇
地舉行造冊達部遇有陞遷事故俱照

先農壇忠孝節義祠定例一體列入交盤項內查明接
受偶或坍塌損隨時修整完固庶典禮永垂不致循

名失實而治民事神俱各咸知謹凜矣為此繕摺具

奏伏乞

皇上睿鑒敕議施行謹

奏

所奏是另旨通行飭諭

同日又

奏為敬陳末議仰祈

睿鑒事竊臣知識短淺每伏讀

皇上欽定律例精詳允當於明罰敕法之中廣如天好
生之德臣下奉行惟恐不力尚有何詞敢贊

高深於萬一但就成例之內可以推廣

聖恩情法兼備者臣不揣愚昧謹列四條為我

皇上敬陳之一獨子留養之例孀婦尤為可矜也一強
竊同居之父兄等知情不知情減等擬罪之處尚
須定議飭遵也一逾限處分應分別初叅二叅之

輕重也一州縣刑書宜一體添設總吏也以上就
臣知識所見敬陳末議是否有當伏乞

皇上睿鑒敕議施行謹

奏

試交廷臣酌議朕觀四條中未必有一二可採擇者

同日又

奏為請

旨事竊查各省鄉試應用簾官自雍正五年欽奉

諭旨將本省知縣入簾之例槩行停止議將隣省在籍
候選之進士舉人確訪文行素優者縣府保送督
撫親加驗看俟隣省調取限八月初一日齊集調
取之省城照例闕防主考進闈之日監臨督撫傳
集當堂公同掣籤掣得內簾者即令入闈分校其
餘即令回籍至外簾之收掌受卷彌封謄錄對讀
五所官仍於本省府州縣佐貳等官選擇委用其
調取之進士舉人往來路費每人給銀三十兩在

本省公費銀內動支等因奉

旨遵行在案今湖北省例分十一房應調取隣省房考
二十人江南七人江西七人河南六人此二十人
內掣用內簾十一人其餘九人即應回籍不特虛
糜公費亦且旋來旋去徒滋往返之勞以臣愚見
與其無事空回不若即令分掣外簾五所俾得各
司所事免調本省府州縣佐貳等官委用則隣省
人員既不虛跋涉之苦而本省佐貳亦可無調委

之繁矣再查各省現有藩臬兩司衙門學習進士或十人五六人不等皆係甫登科第文藝未荒學習非比專官又無地方責任若非分派學習亦為隣省應聘人員似應一體查明經書如湖北應調二十人現有學習進士六人止須調取隣省一十四人於臨場之日與隣省人員一同掣籤分入內外簾之用如此則簾官俱慎重周密佐貳亦得各勤職守於科場條例及料理地方似屬均有裨益

伏乞

皇上敕示遵行謹

奏

此奏是交禮部議覆有旨

同日又

奏為備陳鄖歸二屬勸墾修城之要務仰祈

睿鑒事竊查湖北缺荒地畝惟荆襄鄖歸四府州皆不足原額而荆襄二府猶為荒熟相等惟鄖陽府屬

六縣通計原額徵糧田地共四萬九千二百六十餘頃現止成熟陞科五千六百一十餘頃尚荒四萬三千六百四十餘頃歸州所屬除恩施一縣新經改設外通計一州三縣原額徵糧田地共一萬六百餘頃現止成熟陞科五百六十餘頃尚荒一萬餘頃上年奉部文行將民間舊荒地畝逐一查勘分別可墾不可墾內有貧民無力者許借給牛種限年陞科一案臣到任後詢據鄖陽府開報所

屬可墾田地僅一百一十九頃有零歸州所屬尚未清查報到臣詳加訪察鄖歸二屬荒缺固多而民間欺隱包占者亦復不少府州各屬以地處偏僻悉皆因陋就簡並不加意招徠實心勸墾不但賦稅虛懸亦且經費無出從前未定養廉官役俸工不敷一切取之里下以致每年完辦雜派多於正供如果田地盡屬缺荒安能有此額外之承應此事理之顯而易見者臣現在檄行曉諭宣布

聖恩務令陸續首報概免從前隱匿之罪一面飭行鄖
歸二屬設法勸墾其有主荒地勒限半年聽本人
自行墾復按照水旱限年陞科倘過限不報即許
他人赴官承墾開明頃畝四至給照管業出資墾
熟完糧以期次第足額并請

聖恩准將現今首報墾陞之稅先補足鄖歸二屬官役
前因歸宣光條奏業有諭旨矣此事全賴汝等封疆大
俸工銀兩以示鼓勵一切雜派槩行禁革則民力
吏善於開導實力督勸加意經理不致絲毫擾累百姓
寬紓田疇日闢俸工有賴經制無虧是亦整理之

方為

美舉

要務也再查鄖陽所屬城垣除鄖房二縣完固外

如保康鄖西竹山竹谿四縣并歸州之城現俱僅存基址至興山長邑巴東恩施各縣則原本無城可否姑緩置議其鄖西等州縣坍廢城垣自應酌

修補

議修築以固疆圉查司庫現有楚商捐備公用等

似此

城垣尚非急務雖經有旨命地方官量力而為然大動公項興造且可不必

項銀八萬餘兩可否飭將鄖西歸州等處坍廢城垣相其緊要者確實估計工料陸續興修以復舊

制臣未敢擅便合先具摺

奏請伏乞

皇上睿鑒飭示遵行謹

奏

覽

同日又

奏為謹陳屯衛事宜仰祈

睿鑒事竊湖北九衛一所各有經管屯田每逢漕運之時衛所僉點旗丁除領錢糧之外一切幫費皆由

屯軍所出故當日屯田之設原為贍運而屯糧之輕本以卹軍迨後軍有逃故田日荒蕪或為軍墾或為民墾其貧苦屯丁又將軍田輾轉典賣田去丁存幫費遂無所出查每船旗丁幫費有二百餘兩者有一百七八十兩者亦有一百三四十兩者歷有收冊為憑原係因屯尋軍亦猶民賦之丁隨糧辦也自屯為勢豪兼并在戶衆屯多者幫貼尚易惟屯田已無一畝丁又單寡力難幫貼不追則

運費無出追則赤貧無完而魚并之家日據無差之產坐享糧輕之田窮丁不敢過問而旗丁之私收幫費又無定額總屬預收肥橐比至漕運開船旗丁又屬空手不但窮丁受困亦於漕運無濟今欲除此弊惟有因屯起運之一法如一衛該船若干隻該幫費若干兩統計一衛屯糧若干石從公酌定照上中下則分派每石幫費若干就其一船所收之數再加核減寧少毋多所派幫費隨糧完

納平徵無耗官徵官給彙解道庫每年修船出運
時當堂散給旗丁收領濟運總之按田出費並不
按丁派銀則苦樂均平豪強不能脫漏窮丁獲免
追呼矣現今德安襄陽蘄州三衛皆已照糧徵收
已有成效但未經

題請各衛從違不一理合據實

奏明請

旨再查各衛屯田坐落不一有丁在湖北而屯在湖南

者亦有丁在湖南而屯在湖北者相隔遙遠屯丁完納錢糧不能自封投櫃止憑衛所差役墨帖收糧至省代納侵收花費那舊掩新積欠仍累屯丁官民均受其害以臣愚見似應援照山東山西陝西廣東之例將衛所裁汰查明各屯坐落處所歸并就近州縣徵收所有倉丁出運等事俱令清軍同知管理將貼軍幫費悉如前議按田均徵州縣徑解道庫臨運給發自無貽悞如此各歸各縣屯

民完納甚便幫費官徵官給旗丁亦得實濟漕運
永無遲悞民屯不致相歧實於地方有益合併陳

奏請

旨伏乞

皇上睿鑒施行謹

奏

所奏屯衛事宜與邁柱趙弘恩詳細斟酌妥確會題請

旨

同日又

奏為據實奏

聞事竊臣受

恩深重夙夜祇懼抵任以來事必躬親政無旁貸確見
楚省吏治總屬因循疲玩案無論難易一概沉擱
遲延事無分緩急悉以游移請示中無辦事之實
心徒多掩飾於耳目臣凡接見屬員罔不諄諄告
誡而面從心違者比比皆是臣因特設課吏一法

通飭令將每日所行大小政事備細開單近省府
州縣地方之大者半月一報簡僻者一月一報遠
省府州縣地方之大者十日一報簡僻者半月一
報臣親自披閱有應指示者逐條就單批諭舛謬
者教之勤勞者獎之庶各屬之才情識見隨時如
見其人不能毫忽欺掩臣復密加訪察互相稽考
無非欲各屬知所奮興勉為良吏上報

除甲一事不必嚴急酌量屬員之才具而督行之
君恩下安黎庶即如保甲之緊要規條命盜之勘審初

情操練民壯平治道塗以及修整學宮規制重建社稷山川壇壝清理積案滌除陋規無一非有關政體次第通行但整頓在積玩之後奉行伊始或多畏難苟安未免視為多事臣蒙

皇上訓誨之諄期望之切何敢瞻前顧後畏首畏尾避嫌避怨甘心自蹈庸碌之咎而不力為整飭以致貽誤地方除現在一切事宜悉與督臣邁柱和衷商酌分別

題奏外謹就臣到任後所行各項事件不揣冒昧一
一據實陳明伏乞

皇上睿鑒謹

奏

如是勤敏奉職秉公察吏甚好朕實嘉悅覽焉勉之

雍正十年三月初八日湖北巡撫臣王士俊謹

奏為

聖主誠敬遠孚楚省麥苗雨足米價平減恭慰

聖懷事竊臣前准部咨以近京雨雪冬春未溥欽承
上諭令廷臣督撫預籌良策仰見

聖心時切民瘼至誠昭格有感胥通仲春望前伏聞
京都得雪兆庶歡呼

天心仁愛悉由

聖主誠敬之所致而楚省亦於二月十二日以後連朝
得雨二麥盛茂至二十五日天氣大晴楚民復於
冬耕餘剩之田添種春蕎力勤東作三月初三四

等日又得微雨滋潤麥俱揚花吐秀省城以及各
府米價現在平減臣復切諭所屬相時平糶務求
民食無缺不敢絲毫縱肆庶幾上迓

天和仰慰

聖懷於萬一耳所有楚省麥苗雨足米價平減緣由理

合恭摺

奏報伏乞

睿鑒謹

奏

以手加額覽焉

同日又

奏為請留大員督墾以收實效事竊湖北荆襄鄖歸四府州俱有荒缺田地而鄖陽歸州所屬為尤甚除從前欺隱者諭令速行自首外其實在額荒自應設法勸墾前經陳

奏在案臣思勸墾之法固當責之該地方官而於四

府州內巡行查察招徠勸課必得大員親身董率
方克有成伏查湖廣巡察歸宣光今當一年期滿
現在具

題候

旨臣見其留心地方所至加意整飭勤行化導官民相
安詢其巡歷鄖歸等處亦言勸墾宜力知為熟悉
風土之員可否仰請

天恩准令歸宣光以巡察職銜專理荊襄鄖歸四府州

開墾事宜臣另選辦事幹員協同各該地方官查明可墾地畝如有力者聽其自行呈墾無力者許借給牛種限年陞科造冊申報巡察稽查考核如委員及地方官不實力奉行巡察移會督撫查叅三年之內墾業足額准予從優議叙如此督率既有大員勸墾自有實效其於地方大有裨益矣理合具摺請

旨謹

奏

鄭歸等處荒缺田地初由歸宣光奏聞朕方知之今即命伊督理其事似覺不便另有諭旨更留伊在楚巡察一年其勸墾事宜汝於屬官中遴選才幹之員令其實力奉行盡心辦理可也

同日又

奏為請酌定漕船修造之例以紓屯累事竊查湖北額設漕船二百二十八隻每船定例十年大造一

次每隻額領料銀二百一十兩有零其實每船約費至六百金方能如式堅固不敷銀兩歷係九軍幫貼每年小修每隻額銀七兩五錢又需幫貼銀六七十兩不等均係按屯出費若十年內或偶有失風沉溺則管船旗丁於下運賠造新船一隻其費出九軍派造不領帑項此賠造新船不論起造年分惟合舊運屆滿十年卽船身尚屬堅固仍照例另行打造幫費復派九軍此湖北修造漕船之

成例也臣查漕船大造以十年為率如未屆五六運而失風沉溺者賠造無庸再議若其船已經七八運而有失風沉溺之事則距大造之年為期僅有二載乃既令旗丁賠造於二年之前又復另行打造於後不特木料尚新拆廢可惜而窮苦旗丁何堪疊受賠累此失風賠造之船應於定限十年之內稍為變通領修者也又如十年限內每船或有失風一二次例應下運賠造假如賠造之船在

五六運內則距大造正限止有五年其船身堅固者多不妨再運一二年然後領帑大造或十年限內並無失風賠造等事該船於九運已屬朽壞又不妨先期領修以濟漕運此十年大造之例又可不必一概通修者也以臣愚見請嗣後除該船於七運以前損壞者仍著旗丁賠造外若已經八運果係失風沉溺者即准旗丁具領大造帑銀先期大造免其派賠而此八年限前領造之船仍多運

二年至一十二年方准再行領帑又如十年限屆船身尚屬堅固者再令驗修輓運一二次不必屆限即造或十年限內雖無失風等項其船已歷九運朽壞修工浩大者亦准先期一年領帑拆修仍補運一年俟運足一十一年方准大造如此則先後遞修既可以紓衆軍之力而預領補運亦無違於十年之限紓軍力而重漕防似屬均有裨益是否有當伏乞

皇上睿鑒敕議施行謹

奏

所論雖屬近情但各省船隻甚多此端一開未免復滋捏報冒領稽遲草率等弊且亦叅差難齊不勝其擾仍照舊例循行為是

同日又

奏為奏明事竊查湖北省會武昌府學宮為通省首善之地崇聖鄉賢名宦等祠必須位置得體難容

素越有失觀瞻臣自到任恭謁見各祠俱列宮牆
之外相隔遙遠明倫堂反居正殿之後隨令酌量
移改動支道庫存公間款內銀五百兩發交江夏
縣擇吉興修於丁祭前告成又查漢鎮內從前所
建養濟院日久頽廢并黃梅縣屬白湖堤等處為
江廣通行大道堤身斷續有妨行旅亦俱動用存
公銀兩次第整理各在案再臣撫署大堂右側係
書吏科房收貯卷宗承辦事件居住之所歷年久

遠破損欹斜每當風雨不特吏書如同露宿而一切重大卷宗俱被風吹雨濕壞爛不堪不得不急為整葺當即傳喚江夏縣丞逐一確估計需工料銀七百六十兩現在檄行布政使確查藩庫存公閒款銀兩動支購辦工料擇日興工外理合據實

奏明伏乞

皇上睿鑒謹

奏

覽奏知道了但存公銀兩亦當留意節慎不可視為閒款而任情揮霍恐為汝日後之累

同日又

奏為密陳

睿鑒事欽惟我

皇上聖明溥照澤厚恩深矜全肆赦並行於懲貪瘴惡之中將雍正三年以前追賠侵那等項銀兩查明

具

奏恭候

諭旨分別減免釋放已經陸續奉

旨行知遵照在案是此項追賠侵那等銀俱屬從前各
員虧缺正供

國帑尚蒙

聖主敕查減免此外如州縣徵收耗羨本應起解充公
者或因養廉不足未解藩庫或因正項有虧私行

抵補或前官事故無從起解或現任作難不行交代經年累月勒比無完以致正項雖清例應給咨回籍而耗羨未完仍留本地方追比查楚省現有叅革黃陂縣知縣鈕國亮鍾祥縣知縣李素沔陽州知州高廷鏐胡御琦通城縣知縣吳文琦孝感縣知縣張弘敏江陵縣知縣李德澂等俱係離任廢員日給不敷何能完解況查李素吳文琦等本名下虧空正項銀米已蒙查

奏奉

旨豁免則凡雍正三年以前未完耗羨並非正項自應
一併豁免以廣

皇恩方與

特旨無悖且容留廢員定例嚴切更不便藉端稽留臣
現在分析確查辦理合將雍正三年以前未完耗
羨各廢員勒追無完緣由密陳

睿覽各省多有類此者應否邀同正項豁免之例概免

追求即令給咨回籍則仰戴

天恩愈深愈厚矣伏乞

皇上訓示遵行謹

奏

虧欠充公銀兩各員何得混請豁免除非正項三字豈可
對朕而言侵那公項較諸正項尤宜懲戒此等劣員奚
容疎縱縱當嚴追之

雍正十年四月初三日湖北巡撫臣王士俊謹

奏為恭報三春雨足米價平減事竊湖北正值東作
方興三月初十至十三二十八等日連得時雨早
晚二麥倍皆發榮滋長漸已成實豌豆二豆春蕎
亦俱豐茂鄉民現在陸續浸種四月望後即可插
秧所有現今米價均屬平減並無增長不日麥熟
登場民食更當充足臣身任地方夙夜倍深敬畏
不敢一刻縱肆以期上迓

天和仰慰

聖懷於萬一謹繕摺奏

聞伏乞

睿鑒謹

奏

覽奏二麥雨水情形深慰朕念

同日又

奏為密請

睿鑒事恭照

欽定四庫全書

硃批諭旨

卷一百一十三

闕聖忠貫日月義赫古今我

皇上特隆曠典追封三代備極尊崇解州洛陽之後裔

均蒙世襲博士之職

殊恩異數直與

孔廟同垂不朽矣臣查楚省荊州府為

闕聖當年鎮守之地後人即其帥府建立廟宇現在

荊州府城南門之內而

闕聖陵墓亦在陸安府屬當陽縣之漳鄉迄今封域

巍然班班可考是當與解州之祠廟洛邑之陵墓
一例尊崇以昭妥侑者也臣抵楚後即飭荊州府
知府周鍾瑄親身查勘據稱府城廟宇創建年久
殿廡日就頽損且崇祀三代竟無後殿甚為缺畧
其漳鄉祠墓亦俱卑隘不稱觀瞻兩處約湏七八
千金即可修葺等語理合密摺恭

奏仰懇

聖恩准將荊州府城廟貌并漳鄉祠墓

特敕整修於公項內動支敬謹承辦庶

大典光昭永護萬年之有道威名遠震愈彰赫濯之
聲靈矣再查彰鄉奉祀之處現據該府縣詳稱選
有裔孫關朝泰援照解州洛邑准予世襲博士之
例另行會疏

題請合併陳明伏乞

睿鑒謹

奏

正值軍需浩繁之際汝身為封疆大臣不體國家緩急率意奏請甚屬貿貿無知此工汝其籌度若地方公用所能承辦則酌量修整如或不能姑且待之

同日又

奏為請

旨事竊楚省州縣每歲經徵民米例分漕南二項其漕糧則旗丁領運各於水次冬兌冬開運至通倉交卸其南糧則各州縣運送荆倉以供滿洲標營兵

食臣查通省州縣江分上下相距各千有餘里及二千里不等上江如荊州府屬之江陵公安監利松滋等縣向例南漕均辦如應辦漕糧必運至省城查驗方得交付旗丁裝運下江如黃州府屬之黃岡蘄水蘄州廣濟黃梅武昌等州縣向例亦南漕均辦如派撥南糧俱係逆流輓運每至四五月內始抵荆倉上下互運不但船戶腳價需用浩繁且風濤不測常有漂覆貽累之苦而兵食反至遲

誤所當酌量變通務期漕南兩有裨益者莫如將
上江荆屬之江陵等縣無論南漕俱就近留貯荆
倉以給兵食下江黃屬之黃岡等州縣無論南漕
俱就近兌交旗丁起運如此一經改撥將凡州縣
之近南者歸南近漕者歸漕既無遲悞又免跋涉
兼省脚費一舉而備三善實為經久可行現在檄
行司道會議詳

題理合繕摺恭請

睿鑒敕示遵行謹

奏

具題到日有旨

同日又

奏為據實陳明事竊查荆襄等處鄉村貧民前於雍正四五年間被水之時曾有賣身荊州將軍標旗佐領等家服役以圖衣食者當日所得身價不過二三兩契內填一十餘兩不等年來此輩賣身之

人因年歲豐收陸續私潛鄉里地方官緣其賣身
旗下不敢不查拘解訊往返拖累甲鄰人等未免
廢時失業且一經回旗服役父母妻子不能團聚
情殊可憫臣訪聞確實仰體我

皇上子惠元元之至意隨密札商之荊州將軍吳納哈
凡四五兩年賣身窮民准備當日實在身價許其
收贖放回完聚以免查拘拖累茲准吳納哈密覆
業將情願贖身之人只繳當日原價放歸本籍者

已有數百人等語現聞荆襄等處窮民歡聲載道
無不感頌

皇仁至吳納哈與臣並未識面臣到楚後聞其在荆鎮
靜和平兵民愛戴即此贖身一節准臣密札即行
辦理妥協理合據實

奏明伏乞

睿鑒謹

奏

此非吳納哈之辦理妥協蓋慮朕有所知聞而見責故
為是舉耳操守一節向原可取餘無他長且年齒亦近
遲暮矣

雍正十年四月二十日湖北巡撫臣王士俊謹

奏為楚省晴雨以時入夏秧青麥熟米價平減恭慰
聖懷事竊查湖北八府一州仰賴

聖主洪福三春雨水調勻二麥長茂米價平減屢經摺
奏茲自四月初三日雨後即晴至初七日復經得雨

迄今將及半月風日晴朗大麥業已黃熟現在收
割小麥豌豆二豆亦皆秀穗結實鄉村農事克勤
田疇水足穀秧亦俱青發二三寸許犁耕時插婦
子歡忻米價並無增長省城漢口每石七錢五六
分至八九分不等黃州安陸荊襄等府米價俱平
且現有常平倉穀遵例出糶民食自能充足為此
繕摺具

奏伏乞

皇上睿鑒謹

奏

覽雨水麥禾情形及米糧價值朕懷深慰

同日又

奏為奏明事竊臣奉

命撫楚到任五月隨時隨地無不凜遵

聖訓夙夜祇懼察吏安民之外即以整飭營伍訓練兵
丁為要務查湖北撫標額定經制馬步戰守兵共

九百五十五名內除上年臣未到任之先挑選赴陝兵丁外臣於現在標兵無論分防營汛皆嚴諭臣標中軍暨兩營遊守千把等官務令按期操練汰除老弱選募壯健以次頂補總期有一兵必得一兵之實用又以將弁有訓練之專責臣不時傳進內署箭道面加考驗輪番較射分別獎勵以定優劣又因湖北藤牌兵丁俱不能嫺熟臣隨差人前至廣東製買藤牌一百面已經運回分給標兵

督令教師演習以備實用臣雖不才向亦留心武備今謬膺重任敢不殫心竭力加意整飭以盡職守理合將訓練標兵事宜具摺陳

奏伏乞

皇上睿鑒謹

奏

武備實為地方要務極當竭力整飭勿懈

同日又

奏為據實自行檢舉仰祈

睿鑒敕部嚴加議處事竊臣前在廣東布政使任內因保昌縣縣丞邱慈委辦修築園基實能勤謹任事並無遲誤曾於遵

旨保舉案內經臣保舉引

見荷蒙

皇上天恩命往廣東以知縣補用復經督撫會

題實授陽江縣知縣三年以來未有隕越及臣自上

年奉

命撫楚離粵之後仍時為訪察恐其少有過犯臣咎難
逭茲臣差家人自粵回楚風聞邱慙於本年正月
內官署盜失餉銀匿不通報輒刑訊無辜索借士
民銀兩賠補餉銀似此不職之員臣訪聞既確深
愧不能知人誤保理合據實自行檢舉伏乞

皇上敕部嚴加議處施行謹

奏

大凡舉薦人員何能保其始終不移但能除去私心不相袒庇亦可以告無過矣所奏知道了

雍正十年五月十八日湖北巡撫臣王士俊謹

奏為恭報二麥收成禾苗得雨米價平減上慰

聖懷事竊照湖北三春晴雨以時二麥長茂前經屢摺

奏報茲查通省二麥收成分數十分九分八分者居

十之五六七分者居十之三四鄉民一面收麥即

一面秣秧臣於五月初六日率同司道府縣各官

齊至郊外勞勸農夫宣布

皇恩勉其力作親見四野秧青如繡田間饁餉婦子維
勤正在望雨誠求而本日晚至初七日午前即得
甘霖禾苗滋長今本月十一十五等日連得大雨
高下田疇無不霑足不特早稻之秧已插者淳然
興起即晚稻之秧苗亦各乘時遍插現今武昌漢
鎮米價每石七錢六七分至八錢德黃荆襄各府
米價亦俱平減所有二麥收成分數及禾苗得雨

情形理合恭摺

奏報伏乞

睿鑒謹

奏

二麥收成分數暨禾苗米價情形以手加額覽焉

同日又

奏為請

旨通行事竊臣歷任河南廣東以及現今楚省凡接准

部行奉

旨事件轉行下屬豫楚院司各衙門俱用紅筆圈點標
日判行廣東則於部文奉

旨轉行文內院司俱用劄付式年月下墨筆標日後用
押字概不點硃三省式不畫一臣思上司行文下
屬例用紅筆明統屬也若部行奉

旨事件則有

君命在焉臨文詎可不加敬謹今一概硃標僉判實非

臣子所敢安臣循照而行舉筆倍深惶悚如照廣
東程式不知者又謂紛更不敢不據實陳

奏請

旨敕部定議嗣後各省接准部行內有奉

旨事件俱用劄付式墨筆書押概不用硃惟院司自行
牌票仍照常僉判如有轉行奉

旨事件違例用硃者以違制論如此則等威有辨一奉
行而尊卑之分秩然上下率由一舉筆而敬謹之

心常在矣臣不揣愚昧是否有當伏乞

皇上睿鑒

敕議施行謹

奏

與督臣商酌行之何慮有紛更之議此事直省各循舊
式其來已久不便敕諭通行改易

同日又

奏為據實奏

聞事竊查楚省江湖村鎮每多竊劫臣到任之後即嚴行保甲實力稽查武漢沿江如八吉堡等處最為要害之地該處輪派標兵分防彈壓臣復密飭署中軍叅將阮玉堂守備林武畧不時查訪積窩慣賊會同各縣捕巡立法嚴拏在案茲據該備躡緝八吉堡地方有積窩徐中和錢晉封二人暗樓邃室慣積外來匪類駕船竊劫坐地分贓查有上冬漢口河下客舟被盜失去黃絲胡椒各案捕役知

二人素為富家密與講和受賄縱放僅以匪竊三人出名頂案復令徐中和冒稱行家首報巧為漏網等情密稟列臣即飛飭擒拏當獲積窩徐中和錢晉封即於徐中和錢晉封家樓房內搜獲匪黨徐三周四并行劫江南儀徵縣有名盜犯楊起夏又起出盜賊以及為匪囤船三隻灣泊河下續獲匪犯劉夸子等俱經押發按察使唐繼祖收審竊劫各夥黨其江漢兩縣捕役劉玉李祥劉元陳泰

亦俱獲禁現在嚴究事關拏獲積窩理合

奏報伏乞

皇上睿鑒謹

奏

能靖積窩方為弭盜之源殊屬可嘉之至

同日又

奏為據實密奏事竊臣撫楚以來留心察吏每見所屬各官怠於政事且操守一節通省州縣俱難憑

信甚至貪詐而以為才能巧取而視為固有潛遣
家人坐省專伺上司意指希圖掩飾趨避勾通院
司書吏在外打網張羅密行交結探聽風聲造作
蜚語乘間抵隙讒妬公行深為風俗人心之害臣
嚴加察訪訓誡提撕立法稽查設單課吏所有院
司衙門網工積蠹俱各嚴拏究處一切坐省家人
悉皆飭行驅逐不許潛居省會恣意招搖無非肅
清吏治整飭官方共勉實心實政不邀虛譽虛名

臣以藩司為通省庶官之領袖賢否優劣自宜隨地留心得資考核關防嚴密詳慎機宜最為緊要是以臣凡訪有屬員劣蹟必交藩臬兩司公同確訪并密商督臣細查實據然後分別叅處乃臣每詢藩司徐本其於屬員之優劣究屬茫無確見凡有臣交訪密單多宣洩外揚一切辦事毫無擔當且藩署名為封鎖關防一切吏役未能嚴加約束此臣所不敢代為徇隱者也邇來各屬坐省家人

雖亦稍知顧忌而肆意妄行者尚多陽奉陰違即如興國州知州魏鈿臣訪其劣蹟有勒借衿監富民十餘戶每人各一二百兩託稱買穀勒賠繳價私立鹽稅索派里民辦理軍需短發馬價皆有受害確據臣現已密商督臣飭審在案而魏鈿更有縱容無忌者本年三月二十三日臣當堂親拆各屬公文於魏鈿申文內忽夾私書一封隨經拆閱仍欲探聽上司新聞中多隱語又云坐省人已如

昔矣夜郎烏知之等語臣知其誤投而坐省一語
有關吏治特發兩司傳訊魏鈿據供係伊内幕劉
容所作因劉容之父係武昌革職知府張淑郿內
幕平日父子勾通探聽消息此書原欲投知府衙
門不料投入巡撫丈內及訊其坐省家人則現有
家人蘇貴在省訊其夜郎何指則斥臣為貴州人
現有兩司取魏鈿親筆供單可據臣隨將私書撤
行署武昌府康忱提訊蘇貴劉容交通情節魏鈿

不但庇匿劉容更云臣係邊省孤人知府何故急遽乃爾等語竊臣荷蒙

聖明知遇千載一時察吏除姦是所專責不避嫌怨不徇情面有言必

告何敢稍有欺蒙自干重咎今楚省吏治若此所關甚大力除惡習整飭宜先除魏鈿劣蹟現俟督臣飭審

題叅外所有察出私書并驅逐網工坐省各情節理

合繕摺恭行密

奏伏乞

睿鑒謹

奏

秉公執法整理地方是乃專責有何顧忌耶

雍正十年閏五月十三日湖北巡撫臣王士俊謹
奏為恭報楚省田禾雨足米價平減仰慰

聖懷事竊照湖北本年麥熟登場之後通省晴雨以時

米穀價平人民無不安居樂業勤力耕耘禾苗徧
野自五月十五日大雨霑足至二十一二三等日
連得時雨閏五月初四初七初八等日屢獲甘霖
遠鄉僻壤高下田疇稻黍雜糧以及瓜蔬各種悉
皆豐茂早禾現已揚花吐穗中禾晚稻亦俱芄芄
生發不特武漢二府近省為然即據黃安德荊襄
鄖歸各府州陸續具報所屬得雨日期雖稍有先
後亦無不足之處現今武漢二府米價俱平各府

亦無增長所有楚省目下禾苗雨足米價平減情
形理合恭摺具

奏伏乞

睿鑒謹

奏

覽奏楚省雨水霑足米價平減曷勝欣慰

同日又

奏為直陳汎兵號召之弊請

旨嚴行飭禁事竊查楚省江湖汊港四通八達所設塘汛左近每有漁船匪棍及積窩夥黨平日皆與汛兵熟識私餽魚鮓財物不法之徒利其常規勾通一氣多有暗傳消息行劫分贓者蓋楚省江湖各汛向用牛角海螺二種以為號召聲援之具每當客船灣泊過夜汛兵見無重貨客船則借螺角之聲私傳暗號姦匪知無所得伏而不行若有重貨客船見其人多準備汛兵輒將螺角另易其聲以

便姦匪相機行事或止有貨船而無準備者則螺
角之聲又作一樣吹動肆行竊劫而遁臣前會試
往來楚省親身目擊其事迄今留心察訪此害未
除大為行旅之患臣思安兵設汛原以衛民守夜
巡更梆鑼鳥鎗實堪利用彼螺角出於人聲變換
作姦使人莫測不若梆鑼聲響難於假借放鎗警
衆捍禦功多應請嚴行飭禁嗣後水陸塘汛不許
仍用海螺牛角私傳暗號惟於定更之際許放鳥

鎗傳警以次鳴鑼擊梆捱更守望毋得間斷本管
員弁密加查察違者即行究治一遇有警梆鑼齊
擊立即放鎗追捕不許遲延託稱黑夜縱逸并於
緊要口岸之塘汛嚴定賞罰以示勸懲如此則暗
通消息之弊可杜而塘汛得收實效矣是否有當
伏乞

皇上睿鑒施行謹

奏

無論吹角鳴鑼皆資防守乃營汛中之小節何難言之
督提二臣會商更定耶

雍正十年六月十二日湖北巡撫臣王士俊謹

奏為據實查奏事竊湖北兩司不和一案臣檢閱原
卷其事初緣鹽道書辦陳臯聲私刻假印水程給
商行銷引鹽經襄陽府同知李昌期查出通詳發
審總由前任鹽道柳國勲曲護鹽房書辦不行嚴
究假印水程反囑承審之官輕擬外結承審知縣

王琪遂因此婪贓按察使王肅章扶同徇隱於前
訪聞檢舉於後布政使徐鼎則以會審之事獨自
詳駁延案不結均難辭咎今據現任布政使徐本
會同各道審詳招解到臣而假印水程一節依前
審擬究屬含混不明難成信獄臣即嚴加駁飭覆
審并密諭現任鹽道楊宴會同糧道張廷樞將鹽
道衙門歷年各州縣所繳水程逐細按照號簿查
驗有無假印以憑究審隨據該道等檢出雍正五

年正月行銷乙巳綱假印水程八十四張雍正四年十二月乙巳綱假印水程五十七張雍正元年行銷辛丑綱假印水程三張康熙六十一年辛丑綱假印水程八張并於稿簿內查出雍正元年三月十一日該書辦竟用假印案稿繳銷鹽引赴兩淮鹽臣衙門投遞公然釘入簿內從前各官總未察出明係鹽道衙門書辦歷來積弊今始一一敗露當飭嚴加究訊已據審出假印水程原係從前

經管水程書辦王曰恒即王北山販買私鹽而起
後被陳臯聲看破隨通同偽造行使當拘王曰恒
質審供認不諱除現飭該司道等徹底清查究明
該書辦等得贓若干并歷任鹽道有無知情行鹽
各商是否通同作弊確審定擬招解外惟是臣於
命盜等案無不細心推鞠隨到隨審具

題完結案無留牘不敢稍有稽延而獨於此案總因
司道等多所瞻顧一味因循憚於窮究不得不為

反覆駁勘務求確實從前竟有謂臣多事推求者
似此證據確鑿之推求豈特無異議而已若不心悅誠
服非具人心者矣總不必顧慮及此亦不必存意見於
異議臣反躬自問惟有矢公矢慎無黨無偏以期
宵中但一秉公正為之自蒙

仰報

上

天照鑒也勉之

君恩於萬一耳所有現審兩司不和一案之情節及察

出假印水程根由理合據實具

奏伏乞

睿鑒謹

奏

覽

雍正十年六月二十七日湖北巡撫臣王士俊謹
奏為恭報早稻收成數米價平減事竊查湖北地
方自六月十五十九二十一等日大雨之後旋即
晴明鄉民各將早稻收穫據藩司開報武昌府屬
早稻收成十分者居十之三九分者居十之七漢
陽府屬十分者居十之四九分者居十之六黃州

府屬十分者居十之三九分者居十之五八分者
居十之二安陸府屬九分八分者各居十之五德
安府屬九分八分者各居十之五荊州府屬十分
者居十之二九分者居十之五八分者居十之三
襄陽府屬九分者居十之四八分者居十之六鄖
陽府以及歸州山多田冷早稻無多收成亦有八
分至於各屬中禾現皆秀碩晚禾悉皆暢茂目今
米價因新穀已登較前日漸平減通省大畧相同

理合繕摺奏

聞伏乞

睿鑒謹

奏

覽早稻收成分數深為額慶

同日又

奏為據實查案陳明仰祈

睿鑒事本年六月二十日臣於邸抄中見有督臣邁柱

一件

題明事查叅黃州府知府康忱於署武昌府任內以黃安縣典史通揭知縣馮為榕重耗係藩司委員折兌康忱捏作自行訪聞違例用武昌府印文揭報又徇縱典史貪婪於前屢圖規避處分於後督臣作自行檢舉

題叅等因臣接閱全抄不勝駭愕隨即細查原案康忱於本年三月二十五日委署武昌印務其本任

黃州府事恐不能兼顧雖委蘄州知州蔣嘉年暫行護理而一應經手錢糧及所屬倉庫俱例不交代業經咨准部覆在案實與本任卸事者不同康忱於四月二十一日在省訪聞黃安縣知縣馮為榕重耗曾嚴檄行查并關護府查報府牌於四月二十六日行到黃安該縣典史章文傑乘機始於二十八日具詳報府原未通揭護府蔣嘉年據該典史文轉報於五月初三日到省經臣批行藩司

委員前赴黃安拆驗銀櫃并訊取總吏經承確供
飛報去後護府蔣嘉年復先准康忱移會即於初
三日密委黃州府經歷前往黃安提取銀櫃於五
月初八日押解到司藩司即將銀櫃發交康忱會
同署武昌通判卞澍拆兌重耗是實康忱隨於五
月十二日通揭并據兩司轉揭經臣會疏

題叅在案是馮為格之重耗確係康忱查訪在先厥
後典史之詳府藩司之委拆又係康忱經手據實

報叅並非因典史通揭藩司查出而康忱敢於捏作自行訪聞也今督臣並不詳查案情先後月日又不與臣會稿輒以疑似之見檢舉

題叅是欲暗歸臣咎而臣實無瞻顧袒護之處臣受皇上隆恩畀以巡撫重任幸與督臣共事惟願同心協濟始於封疆有益何敢有一毫私意致蹈黨同立異之嫌但督臣才識遠大 臣雖不才亦不敢依違遷就有負

聖恩不得不將康忱被叅情節備陳

天聽仰懇

聖明洞鑒抑臣實有請者臣以寒素書生邊方愚陋蒙
我

聖主特達之知拔置雲霄之上臣日夜感泣惟恐報稱
之未遑何敢復有冀望與督臣爭較之處第臣識
見短淺封疆重大督撫偶有不協必致貽誤地方
關係非淺伏乞

皇上天恩憫臣愚魯調臣部員俾臣朝夕親領

聖訓則犬馬微忱猶得報效於萬一而我

國家進退內外臣工自有一定章程未聞有如是保全
皇上保全臣下之盛心臣生生世世永矢勿忘矣臣不

之理

勝惶悚待

命之至謹

奏

康忱一案交汝審理已有旨矣其間有無屈抑是否捏
揭汝查審後自悲假若被枉是實即當秉公為之剖析

欽定四庫全書

硃批諭旨

卷七十三之五

五十五

設汝懷私袒護抑或固執已見文過飾非亦難逃朕之
鑒照汝與該督邁柱意見不協遂奏請內調甚屬無謂
全不知朕用人行政之苦心卑鄙褊淺殊失大體從來
同官共事未有公而不和者朕時時以此訓諭內外臣
工即訓汝亦經數次豈竟遺忘耶果能公自無不和在
內在外俱係坦途倘不能公則跬步之間難免滯礙何
有內外之分汝不過因叅官一事偶與邁柱不合輒輕
視封疆委任祇為一身利害趨避計此心尚可問乎由

是觀之失和衷之道在汝而不在督臣向後當返已省
疚切勿甘徇私懷而負朕知遇之恩如邁柱舍怨於汝
或有假公濟私之端亦安能逃朕之覺察也此秦朕甚
不取未料汝冒襟狹隘不知朕至於斯極朕雖之聖哲
之資但一光明正大無固執袒庇之念實可質諸

天日汝第加勉自信之道朕信在其中矣無須瞻顧揣度
從前訓汝者甚明悉宜遵奉行之

雍正十年九月十二日湖北巡撫臣王士俊謹

奏為恭謝

天恩事雍正十年八月初五日臣齋摺家人回楚恭捧
皇上賞臣花屯絹兩疋蜜荔枝一瓶到臣隨恭設香案
望

闕叩頭祇領訖伏念臣職任楚疆時深兢惕疊蒙我
皇上至高至厚之恩

賜衣賜食之寵絹出

尚方機杼而新成花樣仰

太平黼黻之華荔為厥貢珍鮮而潤清蜜膏悟至味

調和之用縫衣

衣只被身何及頂踵皆被

核豈足嘗難入肺腑

漿屬套語浮泛不切

龍光懷核親嘗肺腑長含玉液入政深慚製錦倍慎服

不作風波於世上自無冰炭到胃中何有內熱須識

官紀詩何藉蔗漿解消內熱臣惟有凜素絲之節

繪事後素之義

益勵自公懷丹赤之忱力圖仰報五中感激萬倍

強勉語矣偶爾閒筆非係

瞻依謹此繕摺

懼也

奏謝伏乞

皇上睿鑒謹

奏

覽奏謝知道了

同日又

奏為恭謝

聖訓敬繳

御批事本年七月二十四日八月初五日臣兩次齋摺
家人回楚奉到

御批摺匣臣俱恭設香案望

闕叩頭敬謹啟叩跪捧

硃批祇凜

聖訓一一欽遵內有改折漕糧巡查河道兩摺臣以一既知一時愚昧之見亟當戒除自恃已能之心即如前

時愚昧之見仰陳

摺奏請將塘汛海螺換用柳羅悉係任意之率舉實乃天聽蒙我

無益之更張為興利乎為除弊乎以此為實心任事朕

皇上天恩詳諭閣臣將漕糧不應改折巡查仍照舊例

殊不取向後凡欽建一議施一令必待衆論僉同否則

之處逐一分析

請朕指示而後行之方免物論汝等庸封疆重寄為閭
指示傳

省文武具瞻是非臧否豈能掩人之耳目不知返己第

諭到臣伏讀深思益覺前言之謬而我

知怨人則大誤矣朕自御極十年以來凡有興革多緣

皇上不加譴責仍復

臣工條奏必與內外大臣參酌復加詳慎方始施行尚

訓誨周詳使知遵守成憲無事紛更即此有加無已之

招朝更幕改之譏何況汝等地方大吏豈能事事稱人

隆恩能不感深涕泣惟是臣自顧庸愚才識短淺誠恐

心協輿論耶雖然但知為君難為臣不易之苦將此血

封疆重任貽誤非輕是以冒懇

誠對越

聖慈賞臣內用俾得日覲

天地神明驚直做去冀蒙

天顏擴臣智慮以圖犬馬之報原未敢稍萌趨避之私

蒼垂察慈庇縱人言藉藉亦何必瞻前顧後也誠敬為

心有失公忠之素志復蒙

皇上恩加批飭諄切提撕

諭臣公則未有不和任事豈容瞻顧煌煌

天語至聖至明警誡之中倍加策勵

聖恩深重至此報稱愈覺難言況臣邊方下士特荷千

秋之

恩遇較之於衆更有不同返之於心實難自己所謂止不能保身將何為國宣勞朕謂保身要訣惟一公字其

知有

餘潔已趨避總非善策

國不知有身止知有

雖云止知有人者此臣一觀君之畏非不知有人尤當需人
之邪正若恃一己之血氣而傲物凌人則大失聖賢立

執營私有負我

言之本聖人尚言吾非斯人之徒與而誰與豈能離羣
皇上教誨之盛心也所有微臣感激下情理合繕摺

索居而處世耶不知有人此皆錯會不經之論似是而
奏謝

非不必存此心於胷中惟宜以公正統屬和平接物安
天恩并將奉到

詳舉動慎重言行協和同寅慈愛黎庶以責人者責已
御批二封

以恕己者恕人能如是未有不彼此合德互相贊成一
上諭二道一併恭繳伏乞

道同風之政也勉之
睿鑒謹

奏

覽

同日又

奏為恭報鄉場試竣仰祈

睿鑒事竊照湖廣鄉試荷蒙

聖恩南北分闈之後湖北每科額中舉人五十名外輪

加五經中額本科應得三名又

恩加正額五名共該中式舉人五十八名臣於場前將

一應科場事務遵照部頒條例應出示者大書告
示明白曉諭應備辦者檄行藩司先期料理於八
月初三日

欽差正副主考李錦鄧啟元到省臣即照例關防嚴密
於初六日將主考房考等官一併送入文闈自初
八日起至十六日止三場試竣稽察嚴密士論帖
服至於場內受卷彌封等五所臣俱親身督察無
分晝夜勤慎小心次第交明卷數批解內簾聽候

秉公取錄今於九月十二日揭曉出闈除題名試
錄另行恭疏

題報外所有微臣監臨場務辦理完竣事宜理合繕
摺具

奏再查楚省士風從前類多囂競自學臣凌如煥督
率以來士子各勤誦讀咸知守法相安一遵程式

斯或有之

聞往屆三場試藝貼出違式者甚多皆由學臣錄
科濫取之故今科合計三場錯誤被貼者僅三百

非關

取錄得當乃士子習場規應貼出者少耳
餘卷具見學臣取錄寬嚴得當相應一并陳明伏

乞

皇上睿鑒謹

奏

嘉悅覽之

同日又

奏為奏明事竊鄖陽所屬墾荒一案自奉

旨之後臣即詳悉曉諭鄖屬民人勤力務本各將就近

未墾田地相度土宜用工墾闢飭令地方官不時
親身督察善為勸導力能多墾者酌量獎賞無力
開耕者借給牛種助其耕作將現墾地畝報名入
冊仍按水田旱田起科年分照例輸糧務使民無
餘力地無曠土以仰副我

皇上子惠元元之至意今自本年五月起鄖屬六縣據
報現已開墾及自首田地共二百六十六頃有零
尚有陸續墾報者甚多其鄖屬各縣令內除竹山

縣知縣王模奉

旨署理甫經到任容試驗外其鄖縣鄖西房縣竹谿四縣現於勸墾案內竭力辦理俟試看半年之內果否實心勝任再行酌量更換請

旨調用業經咨准部覆在案至保康一縣地僻民刁現任知縣何壇辦事平常於勸墾一事奉行多有未善臣現在會同督臣另選能員

題請調補以收實效理合

奏明再查楚省鄖陽一府之外如直隸歸州及荊州襄陽等屬亦多未墾地畝臣俱一體通行示諭已據各州縣漸次報墾俟有成效另行具

奏合併聲明伏乞

睿鑒謹

奏

覽奏墾闢情形知道了勤加督率該有司實力為之

同日又

奏為奏明事竊照荆關稅務臣自上年十一月到任
接管俱委交荊州府知府周鍾瑄就近查察監收
無論正稅餘羨悉令儘收儘解一切陋規加耗嚴
飭革除務使弊絕風清以仰副我

皇上加惠商旅裕課釐姦之至意惟查關書差役必得
會計精熟巡查勤力者方堪任使前因趙之均管
關案內督臣審

題將通關書役一百一十餘人概入

欽案問擬追贓幾無一人辦事即新募書役又俱一時
不諳關務辦理茫無頭緒臣再四籌畫若輩姦良
不一原難概論在有名積蠹固不容復入滋事其
間豈無誠實因人連累者坐贓非其本罪平時尚
屬小心則與已革復充者有間與其驟行召募既
難旦夕任用且多係伊等子姪親朋承頂除之不
可勝除不若擇其舊役之謹慎守法素諳關務者
嚴加約束兼同新役暫為參用俟新役熟練再將

舊役飭令歸農如此則公務不致有誤而定例亦無違悖矣臣為辦理關務起見理合據實

奏明伏乞

皇上睿鑒謹

奏

召募書役係汝等酌度可否而行之細事不應上聞於朕此奏甚覺失體朕亦無可批示

雍正十年十一月初三日湖北巡撫臣王士俊謹

奏為恭謝

聖訓敬繳

御批事雍正十年十月二十四日臣齋摺家人回楚捧
到

御批摺匣臣隨叩頭敬啟跪讀

硃批各摺

諭旨字字提撕

言言策勵擴淺狹之知識而責己貴嚴即一言一動必

熟思審處求其至當而後可措諸施行篤僚友之
寅恭而待人以誠即所見所聞必設身處地為所
當為而不敢一毫矜傲事必歸諸公正苟執人已
意見即為有負

君恩理無取乎黨同稍或瞻顧依違必致有乖

國體是我

皇上之訓誨周詳皆聖賢所不能外而我

皇上之期望深遠亦祖父所不能加臣撫躬惶汗感激

難名惟有凜遵

聖訓公正統屬和平接物安詳舉動慎重言行協和同

寅慈愛黎庶務期身體力行必誠必敬以仰報

高厚深恩於萬一耳謹此繕摺叩謝

天恩并將奉到

御批奏摺恭繳伏乞

睿鑒謹

奏

今命卿總督河東矣田文鏡莅豫七八年來可謂殫竭心力諸凡舉措深愜朕懷事事俱屬妥協卿向為屬員洞悉伊之居心辦事沉蒙保薦始獲陞晉兼公私之誼而論皆當一一遵守成規不宜任意更張另求美好也能如此即為朕所嘉是若別逞伎倆冀朕優獎為超越田文鏡之人則反誤矣卿不及田文鏡遠甚祇遵朕旨勉力為之

同日又

奏為恭報楚省豐收米價平減事竊照湖北本年雨水調勻高下田禾俱獲豐稔前經具摺奏

聞今據布政使鍾保開報通省實在收成分數查武昌府屬十分九分者居十之六八分者居十之四漢陽府屬十分九分者居十之七八分者居十之三黃州府屬九分八分者各居十之五安陸府屬九分者居十之七八分者居十之三德安府屬十分九者居十之三七九分者居十之七荊州府屬十分九

分者居十之七八分者居十之三襄陽府屬九分者居十之四八分者居十之六鄖陽府屬九分者居十之三八分者居十之七歸州屬九分者居十之四八分者居十之六再查武漢二府米價每石六錢三四分至六錢八九分不等雜糧亦俱充足其餘各府屬米價俱不出七錢之外城鄉黎庶無不含哺鼓腹共樂昇平臣身任封疆欣逢樂歲惟有宣布

皇恩勸民力敦節儉倍深寅畏不敢一毫怠肆以期敬
迓

天和於永久耳所有湖北收成米價情形理合繕摺恭報
伏乞

睿鑒謹

奏

以手加額覽之邁柱王士俊同省共事感蒙

上天慈佑屢賜豐年乃自然之理也知此理之昭然不爽

而不愈勉寅畏可乎

同日又

奏為仰懇

聖恩事竊照荊州府城

關帝廟宇為當年鎮守之帥府前因年久坍塌經臣

摺

奏於荆關節省飯食項內動支修整去後今據荊州

府申報前項廟宇擇其應行修整者逐一辦理并

新建三代崇聖祠及鐘鼓二樓俱於本年十月初二日竣工廟貌煥新觀瞻大壯共用工料銀二千餘兩等情前來臣伏思

關帝血食萬方而荊州尤為靈爽式憑之地且當陽祠墓歸然載在史冊本年又據後裔關朝泰呈請援照解州洛陽之例題請蒙

皇上天恩敕部議准世襲五經博士給劄欽遵在案茲逢

闕廟新修神靈妥侑臣不揣冒昧敬敢上懇

天恩准賜頒發

御書扁額俾臣敬謹恭製擇吉懸掛昭示萬世則

龍章寵錫益彰赫濯之聲靈

宸翰光昭永護金甌於鞏固矣謹

奏

照該撫所請行交翰林院擬扁進呈候揀定書發

同日又

奏為據實奏

聞事竊照本年夏間山東兗州等處雨澤偶愆荷蒙

皇上天恩差員分賑嗣經得雨旋獲豐收東省民人無
不仰被

恩膏樂業安居各得其所臣每閱邸抄實深慶忭茲於
十月初九二十四五等日據江夏漢陽二縣陸續
具報東省來楚就食民人徐梅李應成等一百六
十八戶計大小男婦五百七十餘名口詢據伊等

咸稱俱於本年閏五月間未經得雨之前各由鄴城沂州等處小路沿鄉覓食而來不知本省十分豐收等語臣隨諭令江漢二縣好為安頓并查伊等年力强壯者居多從前一時無知遠出本非樂於轉徙游惰忘歸者可比現今雖值隆冬天氣晴暖自楚至東計日可到必年內早得歸家春耕始可無誤自不便任其久留覓食臣即一面查照伊等籍貫住址密咨河東督臣田文鏡山東撫臣岳

濬知會接收安插一面即自捐養廉按照冊開大小名數逐名各給路費委員分起護送出境仍令關會前途州縣按起接護前進今據江漢二縣具報於十月二十七八等日俱經委員遞送起程去訖但恐尚有陸續前來者臣當一體捐給隨到隨行護送不致少有失所也所有資給東民回籍緣由理合據實奏

聞謹

奏

欣悅覽焉料理殊屬可嘉之至

雍正十年十一月二十五日湖北巡撫臣王士俊

謹

奏為陳明勸墾之實效仰祈

睿鑒事竊照楚省荆襄鄖歸四府州所屬曠土固多隱匿亦復不少歷來州縣各官祇以奉行為具丈未見實心辦理甚至民間已將現墾之地首報陞科

州縣於首報之年即私收銀米入己捏稱新墾詳報上司挨至六年十年方行入冊徵解是小民尚知畏法奉公而官吏竟敢私侵中飽此楚省積年錮弊從前院司道府徇隱之咎所不能辭者也臣抵任後廉訪已得其概不但檄行申飭至再至三亦且耳提面命多方誠諭不遺餘力本年五月欽奉

諭旨令臣督率勸墾臣復令州縣官隨地因時善為勸

導實力開墾通計荆襄鄖歸四府州屬據報雍正
十年分共首墾田地二十三萬五千一百餘畝除
新墾者俱按照年限陞科首報熟業者俱即隨年
入額徵解從此實力奉行自當日有成效仰副

聖懷至於官吏私侵糧稅現據襄陽府查出棗陽縣於
雍正二年報墾旱地一萬八千餘畝每年該納糧
銀七十餘兩計至癸丑年方屆陞科之限而前任
各官即於報墾之年侵收入己現經會疏叅追在

案此外或有似此侵收在官者俟確查到日再行
叅追理合將現今勸墾已有實效情形恭摺奏

聞伏乞

睿鑒謹

奏

楚省勸墾一事甚為緊要今既行有成效可詳悉告之
新撫德齡倣照經理

同日又

奏為敬陳末議仰祈

睿鑒事竊查私鑄錢文定例為首及匠人斬決為從及知情買使者絞決房主鄰佑總甲十家長知而不拏獲舉首者俱照為從例絞決等語夫為首者造其意匠人者成其事俱罪無可寬至於為從之中間有鄉愚無知一時受雇傭工為之挑水打炭所司間雜之事而非合夥分利幫同鑄造者其情似稍有可原知情買使之中亦有停工散局之後方

知私鑄貪其價賤偶為買使而非當場興販者房
主甲隣人等或非貼近居住一時失於查察及有
聞見即行驅逐因恐牽連遂各扶同徇隱而非受
其賄囑庇護者此等之人皆非本身自犯亦屬稍
有可矜因例內向未分別重輕故俱問擬絞決若
輩到案自知必當正法往往茹刑狡辯案莫能結
轉使為首匠作諸人監斃獄底不能明正其罪前
有孝感縣拏獲私鑄一案經前撫臣魏廷珍審明

將知情受雇之李世熙等定擬絞決具

題蒙

皇上如天好生念係受雇傭工之人與合夥私鑄者有
間發往口外種地處效力贖罪欽遵在案雖此案
出自

特恩非臣下所敢援引定擬臣恐以後案件有承審之
員疎忽從事者以例內原無輕重之分不將各犯
情由逐細審出致該犯等情罪不能上達

聖聰亦未可定故敢冒昧陳請嗣後承審私鑄之案可
否亦照強盜并鹽梟聚衆拒捕之例令承審各官
務將法所難宥及情有可原之處一一分析於疏
內聲明仍照本例分別斬絞定擬立決聽候法司
覈覆將法所難宥者即行正法情有可原者酌議
發遣或懇

敕部將從前定例酌量情罪再為分別以定輕重庶無
知誤犯之人皆沐矜全而承審之員亦得易於審

結案件不致久懸矣再查拏獲賭具定例知縣加
二級知府加一級司道督撫等官紀錄二次又拏
獲賭具製造不過半年者照例議叙失察已過半
年拏獲者止免失察處分不准議叙典史巡檢吏
目守備千總把總等官拏獲者亦照州縣例議叙
等語誠我

皇上鼓勵臣工之曠典也但地方各官賢愚不一狡詐
多端如一官拏獲而同城文武佐雜等官輒稱會

差查拏紛紛具報更有後官拏獲而前官稱為先
已訪聞移關新任拏獲者弊端不可枚舉伊等之
意不過圖免失察故為捏報存案迨後審解又因
通報之時已稱協同查拏承審各官無從察其底
裏遂照原案將協拏各官職名一併開列聽候部
議是伊等既得規避失察處分復敢倖邀議叙其
為欺罔實甚臣愚以為欲禁其欺罔之端先開其
可寬之路應請嗣後拏獲賭具亦照拏獲私鑄之

例文官拏獲并免同城武職處分武弁拏獲亦免
同城文職處分交界之所此縣拏獲彼縣亦免處
分止令拏獲之員據實申報俟結案日准予議叙
如有實在協同拏獲之員必將如何協拏之處一
一聲明以憑察核倘有捏飾從重議處至知府以
上各官拏獲者不得概免所屬官員處分致使屬
員怠玩不行查禁其後官拏獲者若將前官竟行
寬免恐其在任之時以為事無後慮不實力稽察

亦未可定惟甫經離任失察不過半年者方准免
議如失察已在半年以上離任者後經別官拏獲
前官仍行議處再查例內所開失察已過半年拏
獲不准議叙之條似指本身失察而言若前官失
察已久而後官於到任後半年以內拏獲者其從
前失察之處實與後官無涉亦應照例一體議叙
又有捕盜同知通判直隸州州同州判等官例內
尚未議及如有拏獲者或照州縣例議叙或照知

府例議叙仰懇

敕部一併分別定議至督撫司道等官加級紀錄之處
應仍照定例遵行庶查拏之員不敢再生欺罔而
賞罰攸分拏獲之員益知感戴力圖報效矣以上
二條係臣芻蕘之見是否有當伏乞

皇上睿鑒施行謹

奏

所奏是該部詳細分別定議具奏

雍正十年十二月初十日新陞河東總督臣王士

俊謹

奏為恭謝

聖訓敬繳

御批事本年十二月初七日臣齋摺家人回楚捧到

御批摺匣臣隨恭設香案望

闕叩頭敬謹啟匣跪讀

硃批諭旨欽遵祇領之下伏念臣受

皇上天恩至高至厚平時之

訓諭提撕靡不刻鏤心版寤寐弗諼至督臣田文鏡公

忠體

國宣力封疆七八年來事事實能仰契

聖心克盡大臣之職臣向在祥符親承教導感佩實深
志期則儆已非一日今蒙

聖恩授臣以河東重任步趨其後論臣之材識萬不如
田文鏡之遠大周詳而念臣之居心實無異田文

鏡之致身竭力何敢妄逞一毫意見輕事更張非
特私心無以自安更何以仰承

君命惟有祇遵

聖諭恪守舊章奮勉自勵以求無忝職守所有臣恭領
聖訓理合繕摺叩


謝並繳

硃批奏摺伏乞

皇上睿鑒謹

奏

如此立志朕嘉是覽之



硃批諭旨卷七十三之五